

LUQATAH: PENDEKATAN BARU DALAM MENANGANI ISU-ISU HARTA YANG TIDAK DI TUNTUT DI UITM KELANTAN

Zanirah Mustafa@Busu^{1,a}, Mohd Miqdad Aswad Ahmad^{2,b}, Husaini Ab. Razab^{3,c}, Siti Fatimah Tasir^{4,d}, Noor Saliza Zainal^{5,e}, Badriah Nordin^{6,f}, Mohd Nasir Ayub^{7,g}

^{1,2,3,4,5}Akademi Pengajian Islam Kontemporari,
Universiti Teknologi MARA Cawangan Kelantan

⁶Sekolah Pengajian Kontemporari Islam Al-Farabi,
Institut Profesional Baitulmal Kampus Putrajaya

⁷Universiti Teknologi MARA Cawangan Kedah

^azanir126@kelantan.uitm.edu.my, ^bmiqdad@kelantan.uitm.edu.my,
^chusaini@kelantan.uitm.edu.my, ^dfatim03@kelantan.uitm.edu.my,
^esaliza351@kelantan.uitm.edu.my, ^fbadriah@ipb.edu.my,
^gmnasir251@kedah.uitm.edu.my

Kata kunci: Luqatah, pengurusan, prosedur, serahan, pemilik, tuntutan

Abstrak. Luqatah merupakan harta temuan atau harta yang hilang dari pemiliknya dan ditemui oleh orang lain. Ia juga ditakrifkan harta tanpa milik yang dihormati yang ditemui di sesuatu tempat yang tidak sepatutnya disimpan dan si penemunya tidak mengetahui orang yang berhak ke atas harta tersebut. Salah satu dari matlamat syariah (maqasid syariah) adalah menjaga harta terutama harta kepunyaan orang Islam dan harta temuan tidak boleh digunakan atau dimusnahkan begitu sahaja tanpa mematuhi kaedah pengurusan luqatah yang sebenar. Kajian ini memfokuskan kepada peranan yang dilaksanakan oleh Pusat Islam Universiti Teknologi MARA Cawangan Kelantan dalam mengendalikan harta luqatah. Antara kekangan yang dihadapi adalah tiada mekanisma tuntutan harta yang sistematik dan selaras. Kajian ini meneliti bagaimana proses penerimaan harta luqatah, cara penghebahan, pengakuan, mengenalpasti pemiliknya, cara penyerahan kepada pemiliknya, syarat-syarat dan cara memanfaatkannya. Selain itu, permasalahan yang dihadapi adalah tiada mekanisma kaedah pengurusan dan pelupusan yang jelas. Oleh itu, matlamat kajian ini adalah memantapkan pengurusan harta luqatah, mengenalpasti kaedah untuk menyelesaikan masalah harta luqatah yang tidak di tuntutan dan cara pemulangan harta luqatah kepada pemiliknya. Method yang digunakan dalam penulisan ini adalah kajian keperpustakaan, kaedah temubual untuk mendapatkan data kajian di samping kaedah pemerhatian. Kajian soal selidik juga di gunakan dan di edarkan kepada responden bagi mengukur tahap kepuasan warga Uitm terhadap proses pengendalian harta luqatah. Kajian ini dapat menghasilkan satu piawaian baru yang lebih sistematik dalam menyelesaikan isu-isu pengendalian harta luqatah selaras dengan ketetapan hukum syarak di Universiti Teknologi MARA Cawangan Kelantan.

Pengenalan

Secara umum, luqatah didefinisikan sebagai barang yang ditemui, di sesuatu tempat yang bukan milik seseorang. Contohnya, seorang Muslim menjumpai sesuatu barang (seperti perhiasan emas dan jam tangan) dan bimbang barang tersebut tersia-sia begitu sahaja lalu dia memungutnya. Kes-kes berkaitan harta luqatah sering berlaku dalam masyarakat Islam di Malaysia. Masjid, surau merupakan tempat-tempat popular berlakunya kes harta Luqathah. Sebagai contoh, Majlis Agama Islam dan Adat Istiadat Melayu Kelantan (MAIK) pada tahun 2017 menghebahkan dalam laman sesawangnya terdapat sebanyak 50 unit barangan Luqathah [1]. Terdapat isu hukum dan penyelesaian fiqh berkaitan dengan harta luqatah ini. Di Malaysia, pengurusan harta luqatah terletak di bawah majlis agama Islam negeri-negeri. Namun ramai masyarakat Islam tidak mengetahui atau maklum tentang hal tersebut, menyebabkan ada di antara mereka tidak tahu apa tindakan yang perlu dibuat apabila menemui dan memungut sesuatu barang Luqatah. Kes-kes berkaitan ini juga timbul persoalan apakah kewajipan yang perlu dilaksanakan oleh pihak penemu barang luqatah. Kes-kes berkaitan harta Luqatah bukan hanya berlaku di tempat awam, tetapi juga sering berlaku di kawasan pelajar seperti di asrama, surau, bilik kuliah dan persekitaran universiti. Namun setakat ini belum ada sistem pengurusan harta Luqatah di universiti-universiti Malaysia. Oleh itu, perlu ada langkah awal untuk mengkaji keperluan pengurusan Luqatah di universiti. Beberapa persoalan perlu diselesaikan, antaranya: (i) Adakah pihak berwajib seperti majlis agama Islam membenarkan sesebuah universiti menubuhkan unit pengurusan luqatah? (ii) Bolehkah pusat Islam/masjid di sesebuah universiti dilantik sebagai pengurus luqatah? (iii) Bagaimanakah pengurusan luqatah dilaksanakan di universiti? Berdasarkan senario di atas maka sewajarnya dikemukakan idea dan kajian bagi merealisasikan perkara tersebut.

Metodologi kajian

Metodologi merupakan sesuatu yang penting dalam pengkajian ilmu supaya kerja itu bermutu. Penggunaan metodologi yang sesuai dengan tajuk kajian adalah amat penting bagi menghasilkan satu kajian yang sempurna dan baik. Kajian ini merupakan kajian tinjauan bagi melihat pengurusan luqatah di UiTM Kelantan. Untuk mendapatkan data dalam kajian ini penulis menggunakan beberapa metodologi iaitu kajian perpustakaan dan kajian lapangan. Kajian perpustakaan dilakukan untuk mendapatkan bahan-bahan dan buku-buku yang berkaitan dengan tajuk kajian. Manakala kajian lapangan pula data diperolehi melalui soal selidik, temubual (interview) dan pemerhatian. Pemerhatian dilakukan disekitar UiTM Kampus Machang. Tempat-tempat yang dijadikan fokus pemerhatian adalah di pejabat, kolej, pos pengawal dan juga di Pusat Islam. Temubual pula dilakukan untuk mendapat keterangan langsung secara lisan dari responden dengan bercakap secara bersemuka. Maklumat diperolehi dari pegawai polis bantuan, pegawai agama, pelajar dan kakitangan UiTM Kampus Machang yang lain berkaitan dengan pengurusan dan pemahaman tentang harta luqatah. Timbul persoalan dan permasalahan yang dihadapi apabila mereka menjumpai sesuatu barang. Apakah yang sepatutnya mereka lakukan, dimana mereka hendak serahkan dan juga bagaimana pemilik barang boleh mengetahui dan mendapatkan kembali barang tersebut.

Konsep harta Luqatah

Definisi Luqatah.Perbincangan luqatah dari sudut bahasa memberikan definisi iaitu nama untuk sesuatu barang yang dipungut oleh seseorang, iaitu yang dijumpai oleh seseorang lalu diambil olehnya atau dikutip setelah tercicir. Namun begitu ‘*alluqt*’ dengan disukunkan atau dimatikan ‘*qaf*’ memberi maksud mengambil sesuatu maka ia dikatakan *laqa’ahu*, *yalqu’uhu*, *waltaqa’ahu*, *yaltaqi’hu*, *iltiqa’ihun*, seterusnya *al-Multaqi’* ialah orang yang mengambil sesuatu itu. Selain itu, terdapat satu ayat di dalam al-Quran yang menyebut mengenai hal ini [2]. Firman Allah SWT:

فَالْتَقَطَهُ آلُ فِرْعَوْنَ لِيَكُونَ لَهُمْ عَدُوًّا وَحَزَنًا إِنَّ فِرْعَوْنَ وَهَامَانَ وَجُنُودَهُمَا كَانُوا خَاطِئِينَ

Maksudnya: “Setelah itu dia dipungut oleh orang-orang Firaun; kesudahannya dia akan menjadi musuh dan menyebabkan dukacita bagi mereka; sesungguhnya Firaun dan Haman serta orang-orangnya adalah golongan yang bersalah.”

(Surah *al-Qa’af*: ayat 8)

Selain itu definisi luqatah dari sudut istilah pula ialah seperti yang diungkapkan oleh Ibn Qudamah iaitu luqatah ialah harta atau barang yang hilang dari pemiliknya dan dijumpai dan dipungut oleh orang lain [3]. Seterusnya definisi yang diberikan oleh ulama Syafi’i dalam hal ini ialah harta atau barang yang dihormati yang tidak diawasi dengan sebaiknya dan pada masa yang sama terdapat orang yang menemuinya itu tidak mengetahui siapakah pemiliknya [4]. Fuqaha Syafi’i mentakrifkan al-luqatah menurut syarak ialah harta atau barang yang dihormati yang tidak dijaga dan orang yang menemuinya itu tidak mengetahui siapakah pemiliknya [5].

Dalil Pensyariat Berkaitan Hukum Harta Luqatah.Memungut barang luqatah adalah dibenarkan oleh syarak bersandarkan kepada beberapa dalil daripada al-Sunnah dan al-Quran:

Berdasarkan hadith yang diriwayatkan oleh Zaid bin Khalid al-Juhani, menurutnya ada seorang lelaki datang mengadap Rasulullah saw dan bertanyakan tentang barang yang ditemui di jalanan. Lalu baginda bersabda:

“Kenalilah ikatan atau bungkusannya. Kemudian umumkan selama setahun. Jika anda tidak kenali pemiliknya, gunakanlah ia dan jadikan nilainya sebagai simpanan anda. Jika pemiliknya datang menuntunya pada bila-bila masa, hendaklah anda serahkan kepadanya”

Lelaki itu bertanya lagi “bagaimana jika barang temuan tersebut berupa kambing yang sesat?, Baginda menjawab:”Ambillah, itu milikmu atau milik saudaramu, atau akan dimakan serigala.”

Lelaki itu masih bertanya lagi “bagaimana jika berupa unta yang tersesat?” Baginda menjawab: “Apa urusannya denganmu?!, Ia ada tapak kaki dan minumannya sendiri, boleh mencari air sendiri dan memakan pohonan, sehingga tuannya menemuinya”

(Sunan Ibn Majah, no hadith 2495)

Terdapat hadith yang diriwayatkan oleh Ubai bin Ka’ab pula bermaksud:

Saya menemui satu uncang yang berisi seratus dinar dan saya pergi untuk menemui Nabi saw, lalu Baginda bersabda: “Umumkan tentangnya selama setahun”. Namun tiada siapa yang mengenalinya

kemudian saya pergi bertemu Baginda lagi. Baginda bersabda: “Umumkanlah selama setahun, sehingga tuannya datang. Jika tiada yang datang engkau gunakanlah”. Lalu saya pun menggunakannya.

(Riwayat Bukhari- no hadith 2294, dan Muslim- no hadith 1723)

Hukum pengambilan atau pemungutan *luqatah* boleh berubah-ubah berdasarkan kepada kemampuan penemunya. Hukum tersebut adalah seperti berikut [6]:


- Wajib, apabila penemunya yakin bahawa dia mampu menguruskan luqatah tersebut. Selain itu, terdapat sangkaan bahawa luqatah tersebut akan disia-siakan atau hilang jika tidak diambil.
- Sunat, apabila penemunya percaya bahawa dia mampu menjaga luqatah tersebut, tetapi jika tidak diambil tidak dikhawatirkan akan hilang atau rosak.
- Makruh bagi seseorang yang ragu-ragu samada mampu menjaganya atau tidak. Jika tidak diambil tidak dikhawatirkan akan hilang atau rosak.
- Haram bagi penemunya yang mengetahui bahawa dirinya akan tamak dan tidak mampu menjaga harta tersebut.

Jenis Luqatah. Luqatah terdapat dua jenis [7]:

- Luqatah Bukan Haiwan: Harta bukan luqatah terdiri daripada:
 - Harta yang cepat rosak, seperti makanan. Penemu boleh membuat pilihan samada untuk memakannya dan diganti, atau menjualnya dan menyimpan nilai harganya;
 - Harta yang cepat rosak tetapi boleh dijaga supaya tidak rosak. Bagi harta jenis ini, wajib bagi penemunya menjaganya, mengelakkannya daripada rosak dengan perbelanjaan sendiri atau menjual sebahagiannya untuk menampung perbelanjaan harta tersebut.
 - Harta yang tidak rosak. Wajib bagi penemunya menjaga harta tersebut sepanjang tempoh hebahan.
- Luqatah Haiwan: harus bagi penemunya memelihara haiwan yang ditemukan dan mengembalikan kepada pemiliknya apabila dituntut. Beliau boleh meminta dari pemiliknya jumlah perbelanjaan yang digunakan. Harus juga bagi penemu untuk menjual dan menyimpan hasil jualan tersebut.

Segala aktiviti manusia terdapat panduan atau hukum mengikut syariat Islam. Perbincangan berkenaan topik ini telah lama dibincangkan oleh fuqaha klasik dan terdapat banyak dalam kitab-kitab warisan fiqh dahulu yang merujuk kepada pelbagai pandangan mazhab. Justeru itu, kaedah muamalat ini wajar diketengahkan dan di aplikasikan mengikut kehendak semasa supaya dapat di ambil manfaat bagi memudahkan pengurusan kehidupan seharian kita.

Cadangan Model Pengurusan Harta Luqatah di Uitm Cawangan Kelantan



Rajah 1: Model Pengurusan Harta Luqatah di UiTMCK

Deskripsi Model Pengurusan Harta Luqatah di UiTM Cawangan Kelantan. Pelaksanaan pengurusan harta luqatah ini adalah gerakkerja kolektif yang memerlukan penglibatan banyak pihak samada bahagian akademik mahupun bahagian pentadbiran di UiTMCK. Gabungan idea dan tenaga serta kesungguhan pihak pengurusan dan warga staf serta mahasiswa akan memudahkan gerakkerja kolektif tersebut.

Matlamat utama model ini dicadang adalah untuk memberi penjelasan mengenai konsep harta luqatah menurut perspektif syarak serta menyediakan tatacara dan garis panduan yang jelas mengenai pengurusan harta luqatah. Selain itu, ia bertujuan menambahbaik dan meningkatkan tahap kecekapan pengurusan harta luqatah supaya lebih efisien dan sistematik serta menyeragamkan bentuk pengurusan harta luqatah bagi seluruh cawangan Uitm. Ianya merupakan usaha secara strategik untuk memantapkan pengurusan harta luqatah di Uitm dan sebagai rujukan semua kakitangan dan pelajar Uitm berhubung kehilangan, penemuan dan hal-lain yang berkaitan harta luqatah.

(a) **Majlis Jawatankuasa Pengendali Harta Luqatah (MJP)**
 Kerangka Model Pengurusan Harta Luqatah ini dinaungi dan ditadbir oleh Jawatankuasa Pengendali Harta Luqatah di cawangan. Jawatankuasa ini dianggotai oleh Rektor sebagai Penaung, Timbalan Rektor PJI sebagai Penasihat dan ahli jawatankuasa yang lain terdiri dari kakitangan akademik dan pentadbiran. Majlis Jawatankuasa ini adalah entiti yang sangat penting dalam proses membuat keputusan setiap tindakan dalam pengurusan harta luqatah. Tugas jawatankuasa adalah mengemukakan pelan cadangan dan pelaksanaan pengurusan harta luqatah, mengenalpasti harta temuan dan menerima penyerahan barang temuan. Selain itu, jawatankuasa ini juga akan mengendalikan maklumbalas yang diterima dari semasa ke semasa. Sebarang penambahbaikan terhadap skop dan fungsi pengendali harta luqatah di UiTMCK mesti melalui dan mendapat persetujuan jawatankuasa tersebut.

(b) **Penasihat & Juruaudit Syariah**

Pihak jawatankuasa juga akan melantik penasihat dan juruaudit syariah. Lantikan dibuat di kalangan kakitangan Akademi Pengajian Islam Kontemporari (ACIS) dan fakulti-fakulti lain di UiTMCK. Fungsi Penasihat Syariah adalah untuk mengemukakan garis panduan, memberi nasihat dan pandangan berkaitan konsep pengurusan harta luqatah serta menilai setiap gerak kerja samada patuh Syariah atau sebaliknya. Manakala Juruaudit bertugas membuat pemeriksaan dan pengesahan kira-kira, bebas mengumpul dan menilai segala bukti mengenai maklumat yang berhubung rapat dengan entiti ekonomi yang spesifik. Ia bertujuan mengenal pasti dan seterusnya melaporkan tahap pertalian antara maklumat yang dikenal pasti dan kriteria yang ditetapkan. Juruaudit syariah adalah satu proses untuk menganalisis, menyemak dan memeriksa operasi dan urus tadbir bertepatan dengan prinsip dan garis panduan syariah.

(c) **Garis Panduan Pengurusan Harta Luqatah**

Antara kandungan garis panduan yang perlu di ambil dalam mengendalikan harta luqatah adalah langkah pertama penemu hendaklah menyerahkan harta yang dijumpai kepada Majlis Jawatankuasa Pengendali Harta Luqatah Uitm Kelantan. Seterusnya, langkah kedua penemu perlu mengisi borang serahan harta luqatah dan menyerahkan barang tersebut kepada pegawai bertanggungjawab untuk menyimpan. Langkah ketiga, satu surat akaun terima harta luqatah akan diberikan kepada penemu sebagai bukti penerimaan. Manakala langkah keempat, pihak Majlis Jawatankuasa Pengendali akan membuat hebahan dan mengeluarkan notis penemuan Harta Luqatah di premis berhampiran harta luqatah ditemui selama setahun. Langkah terakhir, proses pelupusan harta luqatah yang telah tamat tempoh hebahan selama 1 tahun akan melalui proses samada sebut harga, lelongan, tender atau di musnahkan [8].

Proses pelaksanaan dan pengurusan harta luqatah di UiTMCK akan dijalankan secara berperingkat-peringkat.

(d) **Prosedur 1: Penyerahan & Penerimaan Harta Luqatah**

Serahan harta luqatah (harta yang tercicir atau hilang) oleh warga Uitm kepada pihak jawatankuasa pengendali akan lebih meningkat selepas ini di mana mereka mulai sedar wujudnya satu organisasi pemegang amanah yang bertanggungjawab melaksanakan urusan barang-barang temuan di dalam kawasan kampus Uitm Kelantan. Secara asasnya, penemu harta luqatah berkewajipan untuk menjaganya dengan cara yang sepatutnya. Dia tidak bertanggungjawab sekiranya berlaku apa-apa perkara kepada harta tersebut selama mana tidak ada kecuaihan dari pihaknya [9]. Jika dia tidak yakin akan bersikap amanah dan bimbang dia sendiri akan mengambil terus barangan tersebut, makruh baginya mengambilnya. Jika dia merasakan dirinya tidak akan bersikap amanah dan akan mengambilnya untuk memilikinya dan bukan untuk dikembalikan, haram baginya mengambilnya. Maka untuk penjagaan yang lebih terjamin selamat sebaiknya diserahkan kepada Jawatankuasa Pengendali untuk menyimpan dan menguruskannya.

(e) **Prosedur 2: Simpanan & Hebahan**

Pihak jawatankuasa pengendali yang bertugas perlu menyimpan harta luqatah yang diserahkan tersebut di tempat yang selamat dengan cara boleh menarik perhatian pemiliknya. Adalah tidak perlu mendedahkan kesemua ciri-

ciri tersebut. Langkah ini bagi mengelak orang yang tidak bertanggungjawab mengambil kesempatan dengan mengaku sebagai pemiliknya dan mengambil barangan yang bukan miliknya. Tempoh hebahan bagi harta yang bernilai dan sangat penting ialah selama setahun sebagaimana yang disebut dalam hadis Rasulullah S.A.W. [10]. Bagi harta yang tidak begitu bernilai pada pandangan masyarakat, tempoh setahun adalah tidak perlu. Bahkan memadai untuk satu tempoh yang dianggap pada kebiasaannya telah sampai hebahan tersebut kepada pemilik asalnya. Hebahan dalam bentuk notis penemuan harta luqatah akan dibuat di setiap kawasan yang berhampiran dengan harta yang ditemui dengan menyatakan lokasi dan jenis barangan tersebut secara umum.

(f) **Prosedur 3: Tuntutan atau Pemulangan**

Selepas melalui hebahan yang dilakukan, apabila seseorang datang dan menuntut barangan yang ditemui adalah miliknya, pihak jawatankuasa pengendali perlu melakukan tindakan selanjutnya iaitu sesi siasatan dan soal selidik tentang ciri-ciri barang berkenaan [11]. Setelah mendapat pengesahan kehilangan barang yang tepat, proses pemulangan akan dilakukan kepada pemiliknya. Pihak jawatankuasa pengendali boleh mengenakan bayaran perkhidmatan kepada pemilik Harta Luqatah yang ingin membuat tuntutan. Bayaran ini dikenakan sebagai caj penjagaan dan hebahan yang telah dikeluarkan oleh MJP.

(g) **Prosedur 4: Pelupusan & Wang Hasil**

Jika pemilik sebenar tidak datang menuntut harta tersebut, maka harta itu boleh diteruskan kepada prosedur seterusnya iaitu membuat lelongan sama ada secara tertutup atau terbuka. Penilaian semula perlu dibuat ke atas barangan luqatah yang akan dilelong. Prosedur terakhir adalah Prosedur Pengurusan Wang Hasil Harta Luqatah. Wang hasil daripada lelongan Harta Luqatah akan dimasukkan ke dalam tabung khas atau di serahkan kepada pihak Baitulmal. Hasil yang terkumpul di dalam tabung tersebut seterusnya akan digunapakai bagi membangunkan sosio-ekonomi untuk kemaslahatan ummah [12].

Kesimpulan

Kerangka Model Pengurusan harta Luqatah yang dibincangkan di atas merupakan cadangan penulis untuk direalisasikan oleh pihak UiTMCK. Walau bagaimana pun model ini juga relevan dan sesuai diwujudkan di institusi-institusi pengajian tinggi yang lain di Malaysia. Kerjasama erat di antara pengurusan dengan warga kerja serta mahasiswa akan memudahkan pelaksanaan harta luqatah yang patuh syariah di UiTMCK. Kajian berkaitan harta luqatah amat jarang diketahui oleh masyarakat umum. Justeru, pendedahan kepada perkara-perkara asas yang patut diketahui oleh seorang muslim dapat membantunya dalam menunaikan tanggungjawab kita sebagai Muslim. Di samping itu, sistem pengurusan harta luqatah dapat diselaraskan dengan baik. Sehubungan itu, adalah menjadi kewajipan pihak UiTMCK untuk menggalak, mendorong, membantu dan mengusahakan kemajuan dan kesejahteraan warga UiTMCK selaras dengan hukum syarak. Walau bagaimanapun, tugas-tugas tersebut amat berat dan memerlukan penelitian dan cara kerja yang sistematik dan efektif. Justeru itu, pihak UiTMCK diharapkan agar lebih aktif dalam mengendalikan hal ehwal harta luqatah dalam mencapai matlamatnya sebagai pemegang amanah.

Penghargaan

Di sini kami ingin mengucapkan ribuan terima kasih kepada pihak UiTM Cawangan Kelantan kerana memberi tajaan peruntukan dana yuran iCIGI kepada kami untuk membentangkan kertas kerja yang bertajuk Luqatah: Pendekatan Baru Dalam Menangani Isu-Isu Harta Yang Tidak Di Tuntut Di UiTM Kelantan

Rujukan

- [1] Maklumat Ringkas harta luqatah. (2018). Di perolehi daripada <http://www.e-maik.my/portal/index.php/ms/harta-Luqatah>.
- [2] Ibn Manzir (1883), *Lisān al- 'Arab*, Bullag Misr al-Matb'ah al-Kubra al-' Amiriyah, Kaherah.
- [3] Ibn Qudamah (1997), *al-Mughni*, Dar al-'Alim al-Kutub, Saudi Arabia.
- [4] Syamsuddin Muhammad bin Abu al-Abbas Ahmad bin Hamzah bin Syihabuddin al-Ramli al-Manufi al-Mishri al-Anshari (2003), *Nihayah al-Mu'taj ila Syari al-Minhaj*, Dar al-Kutub 'Alamiyyah, Bierut.
- [5] Muhammad Nasri Md. Hussain.et.al (2013). *Mengurus Harta Menurut Fiqh Muamalat*. Kedah: Universiti Utara Malaysia (UUM Press)
- [6] Mustafa al-Khin, Mustafa al-Bugha & Ali al-Syarbaji (2005), *Fiqh al-Manhaji*, Jil.7, Prospecta Printers Sdn.Bhd.

- [7] Jabatan Wakaf, Zakat dan Haji (JAWHAR) (2009), *Manual Pengurusan Harta Luqathah*. Putrajaya: JAWHAR
- [8] Muhammad Nasri Md. Hussain.et.al (2013). *Mengurus Harta Menurut Fiqh Muamalat*. Kedah: Universiti Utara Malaysia (UUM Press)
- [9] Jabatan Wakaf, Zakat dan Haji (JAWHAR) (2009), *Manual Pengurusan Harta Luqathah*. Putrajaya: JAWHAR.
- [10] Wahbah al-Zuhaili.Penterjemah Ahmad Shahbari Salamon et.al (1999). *Fiqh & Perundangan Islam*.Kuala Lumpur. Dewan Bahasa dan Pustaka.
- [11] Jabatan Wakaf, Zakat dan Haji (JAWHAR) (2009), *Manual Pengurusan Harta Luqathah*. Putrajaya: JAWHAR.
- [12] Jabatan Wakaf, Zakat dan Haji (JAWHAR) (2009), *Manual Pengurusan Harta Luqathah*. Putrajaya: JAWHAR.